

11. maj 2006

UPA 2006/21

**Radiukkut tv-kkullu aallakaatitsisarneq pillugu Inatsisartut peqqussutaata
allangortinneqarnissaanik siunnersuut**

pillugu

Inatsisartut Kultureqarnermut Ilinniartitaanermullu Ataatsimiititaliaata

ISUMALIUTISSISSUTAA

Siunnersuutip aappassaaneerpeqarnerani saqqummiunneqartoq

Inatsisartut Kultureqarnermut Ilinniartitaanermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Juliane Henningsen, Inuit Ataqatigiit, siulittaasoq
Inatsisartunut ilaasortaq Kristian Jeremiassen, Atassut, siulittaasup tullia
Inatsisartunut ilaasortaq Ruth Heilmann, Siumut
Inatsisartunut ilaasortaq Isak Davidsen, Siumut
Inatsisartunut ilaasortaq Astrid Fleischer Rex, Demokraatit

UPA 2006-imi siulleermeerinerup kingorna ataatsimiititaliap peqqussutissatut
siunnersuut misissorpaa imalu oqaaseqarfigissallugu:

Siunnersuutip imarisaa

Radiukkut tv-kkullu aallakaatitsisarneq pillugu Inatsisartut peqqussutaata
allangortinneqarnissaanik siunnersuummik Kultureqarnermut, Ilinniartitaanermut,
Ilisimatusarnermut Ilageeqarnermullu Naalakkersuisoq saqqummiussivoq.

Inatsisartut peqqussutaatigut atuuttukkut ukiorlu manna 1. januar atortuulersukkut
radiukkut tv-kkullu aallakaatitsisarneq pillugu inatsiseqarneq ukiut 15-it
ingerlaneranni siullermeertumik ataatsimut nutarterneqarpoq. Taassuma imarisai ima
annertutigalutillu pisariutigippat ataasiakkaanik naapertuutinngitsunik peqartoq
kingusinnerusukkut paasineqarsimalluni siunnersuullu matumani pineqartoq
aqqutigalugu taakku aqqiivigineqarnissaat siunertaavoq. Nuna tamakkerlugu
aallakaatitsinissamik akuersissutit eqqarsaatigalugit akuersissummut akitsuutinik

akileeqqusissuteqarnissamut inatsisikkut tunngavissiinissaq siunnersuutikkut pingaarnertut anguniarneqarpoq. Tamatuma saniatigut KNR-imi siulersuisunut aamma Radio- tv-milu aalajangiisartunut ilaasortassanik toqqaasarnermi sumi najugaqarnissamik aalajangersakkat allanngortinneqarnissaat Naalakkersuisut tulluurtutut isumaqarfigaat, toqqarneqarsinnaasut piginnaanillit sumi najugaqarneri tunngavigiinnarlugit toqqarneqarsinnaannginnissaat pinngitsoorniarlugu. Kiisalu najukkani nutaarsiassat nutaarsiassanik aallakaatitassiatut immikkoortutut isigineqartussaanerat pillugu najukkani radio- aamma tv-qarfiit najukkani innuttaasunut paasissutissiisarnissaannik peqqussummi piumasaqaatit erseqqissarneqarnissaat siunnersuutigineqarpoq.

Tusarniaaneq

Siunnersuut ukununga tusarniaassutigineqarsimasoq ataatsimiititaliamit oqaatigineqassaaq: KNR, STTK, Radio- tv-milu aalajangiisartunut, Aningaasaqarnermut Pisorta qarfik, Akileraartarnermut Pisorta qarfik, Kultureqarnermut ministere qarfik. Oqaaseqaatit tiguneqartut siunnersuummut ilanngunneqarsimasut Naalakkersuisut paasissutissiisutigaat.

Ataatsimiititaliap siunnersuummik suliarinninnera

Partiit tamarmik Naalakkersuisullu siunnersuut tunngaviatigut taperseraat ataatsimiititaliamillu suliarineqarnissaa inassutigigaat Inatsisartut Kultureqarnermut Ilinniartitaanermullu Ataatsimiititaliaannit oqaatigineqassaaq.

Radiukkut tv-kkullu aallakaatitsisarneq pillugu Inatsisartut peqqussutaannut atuuttumut sanillullugu aaqiissutissatut siunnersuutigineqartut ataatsimiititaliamit tamakkiisumik taperserneqarput. Aallakaatitsinissamik akuersissummut akitsuutinik akileeqqusissuteqarnermut atatillugu inatsisikkut tunngaviit ersarissaavigineqarnissaat ataatsimiititaliap naapertuuttutut isigaa. Najukkani radioqarfinni tv-qarfinnilu nutaarsiassanik paasissutissanillu annertunerusumik aallakaatitsinnaanissamut periarfissiineq ataatsimiititaliamit taperserneqarpoq. KNR-imi siulersuisunut aamma Radio- tv-milu aalajangiisartunut ilaasortassanik toqqaasoqassatillugu - pineqartoq nunatsinni nunattaluunniit avataani najugaqarnermut apeqqutaatinnagu - piginnaasat pisariaqartut pingaartinneqartarnissaat ataatsimiititaliamit pingaartinneqarpoq. Nunatsinnili inuiaqatigiinni pissutsinik minnerunngitsumillu oqaatsitsinnik kulturitsinnillu pineqartup ilisimasaqarnissaata assorsuaq pingaartinneqarnera ataatsimiititaliamit erseqqissarumaneqarpoq. Allannguinerit maleruagassat eqaannerulernerannik nassataqassasut ataatsimiititaliaq isumaqarpoq.

Kalaallisut aallakaatitat KNR-imit ukiuni aggersuni amerliniarneqarnerat ataatsimiititaliamit nuannaarutigineqarpoq. Naammassisassat pillugit Naalakkersuisut KNR-illu isumaqatigiissutaata nassiunneqarnissaa ataatsimiititaliap qilanaaraa. Taamatuttaaq KNR-ip ukiumoortumik nalunaarusaata nassiunneqarnissaa ataatsimiititaliamit kissaatigineqarpoq ataatsimiititaliamillu

naammagisimaarneqarpoq paasissutissat taakku inuiaqatigiinnit
takuneqarsinnaasunnngortinnissat Naalakkersuisut sulissutigiumammassuk.

Tamanna tunngavigalugu siunnersuutip akuersissutigienqarnissaa **ataatsimiititaliap
isumaqatigiittup inassutigaa.**

Taama oqaaseqarluni Inatsisartut Kultureqarnermut Ilinniartitaanermullu
Ataatsimiititaliaata siunnersuut aappassaaniigassanngortippaa.

Juliane Henningsen,
siulittaasoq

Kristian Jeremiassen,
siulittaasup tullia

Ruth Heilmann

Isak Davidsen

Astrid Fleischer Rex